

# NYISGI NI AHEROGI

Adiera Matin Kuom Wach Hera  
Mar Nyasaye Kuomi



JOYCE MEYER

JA NDIKO MANG'ULA MAR NEW YORK

Unless otherwise indicated, all Scripture quotations are taken from  
THE AMPLIFIED BIBLE: Old Testament.

Copyright © 1962, 1964 by Zondervan Publishing House  
(used by permission); THE KING JAMES VERSION; and from  
THE AMPLIFIED NEW TESTAMENT

Copyright © 1958 by the Lockman Foundation  
(used by permission).

Copyright © 2014 by Joyce Meyer Ministries – South Africa

All rights reserved. No part of this publication may be reproduced, distributed, or transmitted in any form or by any means, or stored in a database or retrieval system, without the prior written permission of Joyce Meyer Ministries – South Africa.

Joyce Meyer Ministries – South Africa  
PO Box 5, Cape Town, 8000

Phone: +27 (0) 21 701 1056  
Website: [www.joycemeyer.org](http://www.joycemeyer.org)

Go to [tv.joycemeyer.org](http://tv.joycemeyer.org) to watch Joyce's messages in a variety of languages

Tell Them I Love Them – Luo  
Not For Resale

# WECHE MANTIE



<i>Weche Motelo</i>	4
1. Nyasaye Oheri!	5
2. Bende Long'o Mara Oromo?	10
3. Hera En Tudruok	16
4. Hera Adiera Kod Yie	21
5. Bedo Maonge Kod Luoro	26
6. Hera Manyo	30
7. Hera Mar Nyasaye Biro Loki	34
Lemo Mar Warruok	37
Kuom Jandiko	38

# WECHE MOTELO



An gi yie ni gima dhano dwarzalo moloyo en fwenyruok mar hera Nyasaye kuom ng'ato ka ng'ato. Winjo machalo kama ema chiwo mise mar ng'iyo matut, tudruok machiegni gi Nyasaye kendo ngima mar bedo jaloch kuom Kristo. Ok wadwar wach ma awiye kuom wach hera mar Nyasaye; to wadwaro fwenyruok mar herane e chunywa. Roho Maler kende ema nyalo chiwo ma, kendo obiro timo mano ka wasiko ka walamo e wach hera mar Nyasaye; ka wafwenyo herane e ngimawa wawegi, manyo fwenyno ka okalo kuom somo wach Nyasaye e Muma gi lemo.

En gima yot yie ni Nyasaye ohero piny ngima ahinya ma ne ooro Yesu mondo otho ne richo ji duto. Kata kamano keto paro ni Nyasaye oheri ahinya kendo ni ne onyaloro oro Yesu mondo otho nikech in kendi e piny ok nyal bedo mayot.

Bang' higni mangeny kane asebedo jakristo ma ngimane ni kod rochruek, e gikone ne adwogo afwenyo hera mar Nyasaye kuoma. Nyasaye ei nguono mare kokalo kuom Roho Maler ne ofwenyona hera mare e yor tudruok machiegni e kind En kod an. Fweny ma nyadichel no oseloko ngimana duto kod tudruok kode.

Lemo mara en ni ka isomo kitabuni to ibiro neno kendi iwuon fwenyruok mar hera mar Nyasaye. Ajiwi ni mondo isom mos ka itiyo kode kaka gima tayi e puonjruok malach kuom hera mar Nyasaye e Muma, ka ilamo ndalo duto kuom weche Nyasaye kod paro ma ibiro yudo e wang' kalatas maluwo magi.

# 1



## NYASAYE OHERI!

*“Nyasaye nohero piny ahinya kama, omiyo nochiwu Wuode ma Midewa mondo ng’ama oyie kuome kik lal, to obed gi ngima ma nyaka chieng’.”*

— JOHANA 3:16 NKJV

Nyasaye dwarzjoode, kendo odwaro bedonwa Wuoro. Ne ochwewa mondo wabed gi tudruok kode kendo wabed yawuote kod nyige, ka wadak gi ngima mar gweth mane Kristo otho mundo omiwa. Mano nyiso ni odwaro mondo wagen kuome, wayiengre kuome, wahere, kendo wayie oherwa. Odwaro mondo wabed kode gi adieri kendo wachop ire ka wachando gimoro. Odwaro mondo obed kod tudruok mar hera kod ng’ato ka ng’ato kuomwa.

Ji mathok kuomwa paro Johana 3:16 e winjo malach ahinya. “Ee, ang’eyo ni Yesu ne othona piny,” wawacho mano, to kata kamano “piny” ok en mana dhano manono ma ochok kamoro achiel mane Yesu othona. Ne otho ne ng’ato ka ng’ato kuomwa. Ne otho ne in!

Adiera en ni, ka dine bed in kendi e ng’at ma nitiere e

wang' pinyni, Yesu pod dine otho ne in kendi. Dine okalo e masiche mane okaloe nikech in. Nyasaye oheri ahinya kendo Herane ochwere (som Jeremia 31:3).

Chieng' moro kane ariembo gari, Nyasaye ne owuoyo kod chunya kowacho niya, "Joyce, in e tong wang'a." Jasigu nobiro mapiyo kendo owachona ni, "Koro, donge mano sunga maduong'? Iparo ni in ng'a manade?" Bang'e ne aparo ni, oh! ok owinjore abed gi paro ma kamano.

Fwenyo ni wan jogo ma oval, kendo wan gi mich miwuoro, were kod nyalo, pile bedo ataro mar kaka onego wapar e chunywa. To kata kamano adiera en ni ng'ato ka ng'ato kuomwa, Wuoro ne ochweyo e yo makende, Nyasaye ohero ber mangeny ma opogore opogore, ne ochweyi e yo makende, tiende ni ok odwar mondo ipiemri gi ji mamoko kata temo mundo ichal kodgi. In ng'ama ogeno e chwech mare!

Kane pod aparo wach mane Nyasaye oseketo e chunya, ne aneno tipo mar nyako moro ka ochung' e od chiro maduong' but pidh olemo moko. Ne orango gi kendo ne otero lwete ma okawo moro mane olombo wang'e. Ne atemo winjo matut ote mar Nysasaye mane nyiso ni an ema ne an olemo mane lombo wang'e. An ema ne oyiera. Mano ok nyal nenore makare, to kata kamano, mano e kaka Nyasaye ng'iyo ji duto kuomwa. Ok owach ni ogeni moloyo kendo ni jomoko onge gi nengo kuome. Owacho ni waduto ogenowa. Nyasaye wacho ma e Wachne, kendo Wachne en ne ji duto kuomwa. In e tong wang' Nyasaye.

E kindeno, ne ok arwako gino mane Nyasaye temo nyisa nikech ne ok winjre malong'o bedo kod ber machal kamano kuoma awuon. To kata kamano, bang' ndalo ariyo,

ne ayao Muma mara e Zaburi 17:8, kendo ne ochoma e wang'a tir: "Rita mana kaka dirit wengeni Iwuon, kendo panda e tipo bwombeni." Ne awacho ni "Mano adiera ne en Nyasaye. An e wang' Nyasaye." Omiyo ne awinjo ka an nga't ma ogen kinde duto ma aparo wachno. Be ing'eyo mano ni Nyasaye ogeni kendo odwaro mondo iwinj ni in gi nengo kendo oheri?

Ji gombo e chunygi mondo ohergi. Nyasaye ne ochweyowa kamano. Ji mathoth oketo e pachgi ni Nyasaye ohero piny kendo ohero Yesu, to tek mundo giyie ni gin bende Nyasaye oherogi. Kata obedo ni Ndiko puonjowa ni Nyasaye oherowa mana kaka ohero Yesu. Johana 3:16 nyisowa mano. Kendo Odwaro olo gwethne e ngimawa mana kaka ohero kendo ogwedho Yesu. Johana 5:20 wacho ni, "Wuoro ohero Wuowi kendo oelo (siemone) gik moko duto ma en Owuon otimo. To bende obiro elone (tang'one) timbe madongo moloyo magi mi unuuor."

Nyasaye wacho ka niya, "atimo gik madongo duto kokalo kuom Yesu, kendo gik madongo moloyo kokalo kuom Yesu, mondo ubedo gi ilo" (ma e kaka anene). Nyasaye dwarzardo mondo wayud mor gi ilo moloyo kuom gik madongo ma opoyowa godo.

Wasomo ndiko, to kata kamano nyadingeny ok wafweny tiend gima Nyasaye dwarzardo timo, ok ne wan kendwa, to moloyo kokalo kuomwa. Odwaro mondo wayang tije madongo mane otimo kokalo kuom Yesu kendo wabed gi yie ni Ogombo timo gik madongo kokalo kuomwa wan bende. E Johana 14:12, Yesu wacho niya, "Awachonu adier ni ng'at moyie kuoma notim tije ma atimo. Bende enotim koda timbe madongo moloyo mago nikech adhi ka Wuora."

Nyasaye timo gik mang'eny pile ne ji nikech oherogi, kata kamano ji ok ne. Kuom ranyisi, par ane ni: Pile ka pile ka chieng' wuok, to owuok ne in kod an. Maua bende pichni moro ka moro gi kite ne mor marwa. Piny ma Nyasaye ochweyonwa bende ber moloyo, kendo odwaro mondo wawinjie maber! Chakruok 1 wacho ni Nyasaye ne omiyo dhano tek kendo onyise ni oti gi gik manie piny e jiwotich Nyasaye kod dhano. Ka koth biro e ndalone, to ochwe ne in. Ka ngich bedo, obedo ne in. Okenge duto ma igoyo Ruoth emachiko kendo oriti ndalo duto.

Rapar Mar Chik 7:9 wacho, “Omiyo koro ng’euru ni Ruoth Nyasaye ma Nyasachu en Nyasaye. En Nyasaye ma jaadiera kendo marito singruokne kuom tienge gana gi gana mag ji mohero kendo momako chikne, koherogi gi hera mosiko.

Hera mar Nyasaye kuomwa en hera mosiko kendo ma onge chik moro. Ji mathoth paro ni wasemiyo Nyasaye ojony gi rem kod timbewa maricho to mano ok nyalre. Kendo kata itim ang'o, ok inyal tamo hera mar Nyasaye kuomi.

Hera ok en gima Nyasaye tiyo; En Owuon en hera. Ka iparo ni isebedo ng’atno marachie moloyo ma Nyasaye ok nyal hero, to mano miriambo. Onge bugo matut ahinya ma Nyasaye ok nyal chopoe ma ogoli oko. En kod chenro mar dwogi ire. Ok owe richoni kende ka ikwaye gi chuny motur, to kata kamano wie wil kodgi kendo owitogi mabor kodwa mana kaka wuok chieng' bor gi podho chieng' (som Zaburi 103:10,12).

Inyalo wacho ni, “Ayudo Yesu e chunya, kendo ahere.” To kata kamano, penjo mara en ni, in gi yie marom nade ni Nyasaye oheri?

Hera mar Nyasaye mosiko kendo maonge kod chik en ote mayot ahinya, bende en e mise ma nyaka bed e ngimani mokuongo mondo iwinj tiend gik mamoko. Ang'eyo ni en e chakruok mar chang e ngimawa.

Bedni ipuonjori weche manade, kata isomo kendo imanyo dwarz Nyasaye e wachne gi teko, to ka pod ok iyie ni oheri nono gi lala,ok ibi wuotho kode malach ahinya. Kuom yie wayudo gik moko koa kuom Nyasasye, to yie bende tiyo kod hera (som Jogonalatia 5:6). Koro ka ok warwako hera mar Nyasaye, ok wanyal yudo gimoro amora.

Hera mar Nyasaye bende miyo wadak maonge kod luoro (som 1 Johana 4:18), ma en gima duong' e dago ngima maber kendo chopo dwarz marwa e giko mar ndalo. Be in thuolo mar rwako herane mare kuomi? Ok en mar ohala; ok inyal ng'iewe kod timbeni mabeyo...gima inyal timo en mana rwake, rwake kendo rwake.

# 2



## BENDE LONG’O MARA OROMO?

*Geno machalo kamano ok nyos chunywa, kata miyo wabed ma onge gi adieri kata kuodo wiwa, nikech hera mar Nyasaye oseol e chunywa kokalo kuom Roho Maler ma Osemiyowa. Ka nepod wan gi yomyom [ne pod waonge kod teko makonyowa], e kinde mane owinjore Kristo ne otho ne [e lo] joricho. Ok en gima yot mondo ngato ochiw ngimane kata ne ng’at makare, to mano nyalo timore mana kuom ng’ano man gi nengo, moher kendo mochiwruokne mondo kik otho. To Nyasaye nyiso kendo siemo ayanga hera Mare [Owuon] kuomwa ni ka nepod wan joricho, Kristo [Mesia, Mowir] ne otho ne wan.*

*Kuom mano, nikech oseketa kare (owit oko kethowa, oketwa kare kendo okelwa e tudruok malong’o gi Nyasaye) kokalo kuom remb Kristo, direswa nade [en gima ong’erej] kuom kum mogik kod mirima mager mar Nyasaye. Nikech kane pod wan wasik Nyasaye, to ne omiyo wadonjo e winjruok kode kuom tho mar Wuode. Koro wang’eyo [adimba] ni kaka wasedonjo e winjruok kode, ni ibiro reswa (pile kuom teko mar richo) kokalo kuom chier Mare abedo mangima.”*

– JO-RUMI 5:5-10

En gima yot fwenyo ni Nyasaye oherowa mana ka ok wadonjo e dwanyruok. Chandruok en ni ji mang'eny ok oherore giwegi. Kendo mani miyo giparo ni Nyasaye bende ok oherogi mang'eny. Kata kamano Muma wacho ni "Dhano to en ng'a ma dipare" (Zaburi 8:4). Wan chuech mar Nyasaye kendo awacho machuok ni, Oherowa nikech Oherowa. En hera (som 1 Johana 4:16). Nyasaye oherowa nikech mano e dwarz mare!

Oheri kendo ogeni. Mano nyiso ni in kod kido mari kendi kendo onge ng'at machielo man godo. Ok owinjore ichal kaka an, an bende ok owinjore achal kaka in. Ngimani ok nyal riere tir ka idwaro mana dak e ngima mar pimruok gi ji kod piemruok kodgi. Mano ema imiyogo jasigu thuolo mar nyisi ni pod ok iber moromo. Adier makende en ni, kuom Nyasaye ok ochuno ni nyaka ibed "maber moromo". Yesu osebedo "maber moromo" ma kari. Ne ochulo nengo mar richo magi kendo ne okawo kum mane onego ikaw.

Muma wacho niya, ka ne oheri manomiyo otho nikech in, hera mare koro inyalo pim gi ang'o ka ne ochwero rembe bende nikes in? (som Jorumi 5:8-9). Oheri mangeny mano emomiyo oumo kethoni ma pile ka pile kendo opuodhi kuom richoni duto.

Kuom ranyisi mae e tipo kaka aparo ni Nyasaye ng'iyo timbewa maok odhi kare kod rem marwa. Par ane nyathi matin ma ja higa adek kata ang'wen, ma osebedo ka ng'iyo min mare kaka timo tijene e ot. Nikech ohero min mare ahinya omiyo okawo gir ting'o pi matin kod nanga mar luoko kendo odhi e dirisa mar ng'icho mar dhon. Kendo ne orudhe gi tekone, bang'e oyweyo gi oboke mar kalatas mayom mag lwedo.

Kata kamano, dirisa pod gikone omienore gi sabun, to nyako matinno notiyo kod nanga mane min mare tiyoga godo e timo ler. To kata kamano ne odwogo e ot gi dwol mayom kowacho niya, “mama, mama, aluokoni dirisa! Atimoni tich maber, aheri mama!”

Kuom hera, mamane ne owachone niya, “Ee, mano itimo gima ber miwuoro! Erokamano kuom kony.” Bang'e ka ne nyathi odich komachielo, to ne odhi ma oyweyo kanyo maler. Bang'e, ne ojiwe ka onyise ni ka odwaro timo gimoro to openjo kaeto ong'eyo kaka itimo gik moko e yo makare.

Ma e gima Nyasaye timonwa, kendo onyalo miyo gik moko duto timore maber ka wahere kendo ka oluongowa ne dwarz Mare (som Jo-Rumi 8:28). Ka itimo gimoro maber kaka ing'eye, mano e gima Nyasaye dwarz kuomi. Onyalo, kendo obiro miyo idhi nyime maber ka imedo kwayo kony mare. Obiro loki e kido machal kode ka Lerne medore ameda kuomi (som 2 Korintho 3:18).

*“Nikech Jal mane Nyasaye ooro wacho mana weche Nyasaye [Olando ote mar Nyasaye], Nimar Nyasaye chiwo Roho mogundho ma ok ong'wonyo lwete! Wuoro ohero Wuowi kendo oseketo (en gi adieri, oketo chunye) gik moko duto e lwete”. (Johana 3:34-35).*

Chieng' moro kane asomo wes ni, ne aywak gi mor kane afwenyo ni Nyasaye ok pimnwa Roho Mare. Ok omiya mana matin tin mar moro ka moro. To En Jachiwo mabup kendo onyalo timo moloyo, modhuro, mangeny kendo mokalo kaka wakwaye kata kaka waparo! (Som Joefeso 3:20).

E Rapar mar Chik 7:6-7, Nyasaye wacho niya, “Nimar

un joma oval ni Ruoth Nyasaye ma Nyasachu, Ruoth Nyasaye ma Nyasachu noseyierou e kind ji duto ma e piny mondo ubed ogandane moyiero. Uparo ni Ruoth Nyasaye ma Nyasachu nopalou moyierou nikech ung'eny moloyo ogendni moko koso? Ooyo ka adier to un e oganda matinie moloyo.”

Mano wach ma onego wabed godo mamor, Nyasaye wacho niya, “Ne amiyou hera mara, kendo ne anyisou ni un joma ler. Ne anyisou ni un joma ayiero. Ok ne ayierou nikech long’o ma un godo, to nikech aherou”. Bende ingeyo gino ma Nyasaye dwarzaro mondo itim kawuononi? Odwaro mondo irwak hera Mare. Wek nyiso Nyasaye gik moko duto maricho kuomi nikech kiti ok opoye. Ne oseng’eyo gik moko duto kuomi, nyaka keth mane inyalo timo, e kinde mane oluungi mondo ibedi e winjruok kode.

Chandruok maduong’ ma ng’enywa ni godo en ni ok waherore wan wawegi. Kendo mano emomiyo ok wanyal fwenyo hera mar Nyasaye kuomwa, kata e yo machielo ngeyo ni joma moko bende oherowa. Koro waparo mana ni, ere kaka mano nyalore? An ng’ama marach moloyo! Kendo ka iketo pachi ni in ngat marach moloyo, to ibiro mana timo timbe mag ngat marach. Adier makende en ni pachi ok nyal dhi makal kido ma iseketo e chunyi kaka mari.

Chandruok mara maduong’ ne en ni ne ok aherora an awuon kendo ndalo mangeny ne atemo mondo alokra kaka ne chunya gombo mondo abedi. Kuom ranyisi, ne aparoga ni awuoyo mangeny, koro ne onego apuonjra ling’. To kane abedo moling’ to chunya ne ol kendo ne abedo ma onge gi mor, kendo ji duto ne dwarzaro ng’eyo gima omiyo aling’. Kae to paro moro ne biro na ni, uwachro ni dhoga ngeny koro atemo mondo kik awuo, koro weya uru!

Ok anyal wacho ni ma ne otimore kuom higni marom nadi to pod ne asiko mana ka adonjo e chandruok gi dhogano nikech ne atemo loko kita. Kendo jachien ne oikore mar nyisa kaka wachno ne en gima lich ahinya nikech ndalo duto odwaro mondo wawinj mana ni wan joma richo ma oseng'adnegi bura. Koro ang'eyo kaka fwenyo hera Nyasaye ok yot bang' ka isedonjo e tem moro.

Nyasaye dwaro mundo ibed thuolo iwuog e twech kod kum, to dwarore ibed gi yie kod chir mundo ibed thuolo. Bende ing'eyo ni onge kar romb chuny lit ma inyalo bedogo manyalo chulo richo ma isetimo kata ma inyalo timo. Anwoyo wachni kendo: Yie kuom hera mar Nyasaye e kinde ma idonjo e tem ok en gima yot.

E seche ma kamagi jachien biro temo mundo osandi gi paro maricho kaka in ng'at marach. “Isepodho” obiro nyisi kamano. Iparo ni in ng'a? Nyasaye ok nyal guedhi... ne onego itim maber moloyo ma. Onge ng'ama koro inyalo nyiso wach Yesu koro. Nyasaye ok nyal tiyo kodi. Kendo ok obi duoko alam mari. Onge gima inyalo timo maber.

Ma e kinde madwaro yie motegno kod chir kuom Nyasaye ka ichung' malo ka iwacho ni, “Wuora, asetimo richo e nyimi kendo akwayi mundo ing'uonna. Akwayo nguono gi bolruok kuom gima asetimo, kendo adwaro kech mari.” Bende ber mundo ikwer jachien. Parne ni Yesu ne osechulo gowi mar richo kendo koro oseketi thuolo kendo ionge gi bura. Teko mar wach Nyasaye matiyo e ngimani biro gero yie mari gi adieri kuom Nyasaye. Kendo ibiro bedo gweth ne jomamoko.

Inyalo bedo gi paro ni, ang'o momiyo asiko anwoyo mana timo gima ofuwo pile ka pile? Ne asiko ka aparo

kamano an bende, nyaka ne aweyo paro mar bedo e kum ma kamano. Ka iweyo dago ngima mar kum kod ngado bura mar richo kuom gikma itimo maricho, to biro konyi weyo timo gigo.

Paro mar bedo jaricho kendo ng'ado bura nyalo turi kendo miyo chunyi nyosore e okang' ma ok inyal bedo thuolo. Oketi ibedo gi mayomyom kendo ochiwo yot mar podho e richo. Mano emomiyo nyaka ibed gi chir mar yudo gweth mar nguono kendo siro kum. Nyaka itim yiero mar dago ngima mar yie e wach Nyasaye kendo itamri dak gi paro mar jaricho. Jasigu pod biro wachoni niya, "tiende ni pod ok ine kata ni mano en richo? Nang'o kamano, onego wachno chandi kuom kinde moko matin. Gima ne itimono rach ahinya." To in nyaka iwach mana ni, "Ooyo, ok an. Ok anyal winjo marach kata matin". Bang'e lam Nyasaye mondo okonyi kendo omiyi nguono mar riembo paro marachno kaeto idhi nyime. Chako timo kamano mokwongo ok en gima yot, to obiro bedo mayot achien.

E Isaya 53,,wasomo ni ka Yesu ne okawonwa richowa, ne obedo jaricho (ne okawo kum marwa). Jachien ok dwar mondo ibed thuolo kuom bura. Nang'o? Nikech ka in ngat ma okum to ok inyal yudo hera mar Nyasaye adier. Kum pog i kod Nyasaye kendo ok inyal bedo mamor kama Entiere. Ogolo paroni kuom Nyasaye kendo oduoko kuomi.

Inyalo dak maonge kod kum ka iyie ni ka Nyasaye owacho ni nguono mare oromo umo richoni duto, to owacho chuth. Oheri, kendo nguono kod kech mare gin mich ne in. Yudgi kawuono!

# 3



## HERA EN TUDRUOK

*“Wang’eyo (wawinjo matut, wayango, wasiko waparo, kuom neno kod lony) hera ma Nyasaye oherowago, kendo wageno (timo kaka dwarore, keto yie e iye, kendo geno kuom) kuom herano. Nyasaye en hera kendo ng’at mosiko ei hera, osiko ei Nyasaye, kendo Nyasaye osiko e iye.”*

– 1 JOHANA 4:16

Kaka ndikoni wacho, Nyasaye en hera, kendo Odwaro mondo wayangi, wabedie kendo wasik ka wang’eyo hera Mare. Koro ere kaka inyalo siko ng’eyo hera mar Nyasaye? Kata bed ni Oheri marom nadé, ka ok iyango hera mare, onge ohala ma ibiro bedo godo. Par ane kaka iwinjoga ka ng’ato oheri mang’eny.

Pile ibedo gi chir ka ing’eyo ni oheri. Nyasaye oheri kendo odwaro nyisi herano. Oluongowa waduto e tudruok matut kode. Odwaro mondo warwake e gigo duto ma watimo. Kendo odwaro mondo wago kode mbaka kaka inyalo timo gi osiepni.

Bende in kod tudruok machiegni kendo madieri gi Nyasaye? Ka onywolwa nywol manyien, to ok en gima

ong'ere ni nyaka wabed e mbaka malich ahinya kod Nyasaye. Nyaka wagek tudruok marwa kode, man kaka watimo kod joma moko. Ne an ja kristo e higni mang'eny mokalo ka ne pok abedo motegno e wuotho gi Nyasaye. Ne adhi kanisa chieng' Jumapil kendo ne achiwora konyo tije moko, to e ngimana Nyasaye ne ok ochuno ahinya. Ne awinjo ka an nono kendo an gi dwarz. Kuom sani en e gima aparo mokwongo gokinyi kendo ma aparo mogik e otieno. Wagoyo mbaka kanyakla e odiechieng', kendo onge gima adwarz moloyo tiyo ne Nyasacha kendo miye mor.

Nitiere mbanya moro mar ranyisi mar Nyasaye e chuny ng'ato ka ng'ato ma Nyasaye kende ema nyalo pong'o. Onge gimoro machielo ma inyalo manyo kata gombo manyalo pong'o kanyo. Ajiwi ni ipenjri kendi: An kod tudruok mapek marom nadi e kinda gi Nyasaye? Bende aikora mar kete kod dwarzone mokwongo. Bende anyalo wacho kaka Paulo ne otimo e Tich Joote 17:28, "Nikech kuome ema wadakie, kendo ema wawuothoe, bende ema wantie?"

Nyasaye oheri, kendo in kod nengo kuome. Ne ochweyi mondo ibed gi tudruok kode. Ma e gombo mare maduong' kendo dwarz mare maber chuth ne ngimani. Owuoyo kodi mos e chunyi e chakruok mar odiechieng' pilepile. "Oyawore, aheri." Ka ok isebedo ka iwinje ka owachoni wechegi, bende inyalo chako winjo kendo iket yie?

Osiepna moro ne neno Wuon mare kaka ne dhi e miech ji e piny Amerika kane gichiew gokinyi. Ne odonjo ka oikore mar wuoyo kendo goyo kodgi mbaka kuom wach Nyasaye. Ne en gi kom kod mesa mane obedo godo piny. Ji ne chiewo kendo ne gibiro, kendo gi dhi; ne gibiro, kendo gi dhi. Ne gisiko ka ginyiso Nyasaye niya, "wabiro duogo bang'e. Ritwa kanyo mana matin, Nyasaye. Ka atieko gima

atimo, to aduogo wuoyo kodi. Abiro go kodi mbaka bang'e, Nyasaye. Bang'e, Nyasaye. Bang'e, Nyasaye."

Giko mar odiechieng ne ochopo. Nyasaye ne oweyo miechgi ka nenore malich nikech chieng'no ne onge ng'ama obiro mondo owuo Kode. Ji duto ne odich e dwachgi mane gineno ni duong' ahinya kendo ne gionge thuolo ne Nyasaye.

Kik ibed modich ahinya ne Nyasaye. Ka ionge gi thuolo mar lemo kendo kawo kinde kode, to kare idich ahinya. Kaw kinde mondo inyis Nyasaye kaka ihere. Ka gik moko duto orumo, onge gima biro dong' mak mana Nyasaye. Mano e En! Kendo ka ionge gi tudruok kode e seche go, to idhi yudo ideko mar chako.

Wuonwa nyocha onindo machiegni ni, kendo amor mar wacho ni ne oyudo Yesu kaka Jawarne higni adek chien kapok otho. Kata obedo ni wuonwa odhi e polo kamano, to ne ok oyudo mor mar dago ngima kaka jaloch ne Nyasaye. Pile ne odak ne ngimane owuon. Kik irit chopo e giko mar ngimani ka iywago ang'e nikech ne iketho seche e gik mane onge kod nengo chuth. Kinde en mich makende ma Nyasaye chiwo, kendo nyaka wabed motang' kaka watiyo kod kinde ma wan godo. Tiende ni, ka osekalo to ok oduog kendo. Kinde ma ikawo kod Nyasaye kelo gweth mogundho, to gik mamoko mang'eny chiwo mana ilo ma nengone tek.

Ang'adoni rieko mundo ing'ad wach e higa mabironi ka iketo pachi kuom hera mar Nyasaye, ka isomo weche mag hero kawuok e Muma, mundo ipuonjri kaka inyalo nwang'o hera Mare. Hera mar Nyasaye kelo ber mangeny, kwe, mor kod gombo mar ngima.

1 Johana 4:16 wacho niya, "Wang'eyo (wawinjo, wayango, wasiko wangeyo, kuom neno kod lony) hera ma

Nyasaye oherowago, kendo wageno (timo kaka dwarore, keto yie, kendo geno) kuom herano. Nyasaye en hera kendo ng'at mosiko ei hera, osiko ei Nyasaye, kendo Nyasaye osiko e iye.

Ok inyal winjo ka oheri gokinyi ahinya. Nyalo bedo ni ionge kod teko, kendo inyalo ngeyo ni odiechiengi ok dhi bedo gi mor. Wach maber en ni, inyalo loko pachi ka iwacho weche majiwi kedo matego yieni. Wach matek niya, "Nyasaye ohera ahinya. An e tong Wang'e, kendo en koda gi chenro maber." Ka ibiro wuoyo kuom Nyasaye kod wachne kar wuoyo kuom chandruokni kod kaka iwinjo, to mae nyalo loko odiechiengi.

Nyaka igo mbaka kendi iwuon ma ifweny ni hera mar Nyasaye oketi diere. Muma wacho niya, Ne! Asegori e tat lweta (Isaya 49:16). Anyalo nene malo kucha kowacho niya, "Ng'i, Nee macha? Donge gibeyo? Aherogi ahinya. Nee nyithinda, kaka gin e chuny lweta." Osiko ka oparoni ni Oheri kendo ogombo mondo ubed kode e mbaka kanyakla.

Nyaka ipar goyone Nyasaye erokamano kendo loso tudruok malach mar mbaka ma ok rum Kode. Seche moko inyalo dwarz weyo matin gima itimo ka ikawo thuolo mar goyone Nyasaye erokamano ka inyise ni ing'eye kendo inyise kaka en Ng'ama iwuoro. Bed mos kendo iher Nyasaye. 1 Johana 4:16-17 wacho niya, "Nyasaye en hera, ng'ano madak kendo medore e hera, dak kendo medore kuom Nyasaye, kendo Nyasaye dak kendo medore kuome. Kuom [riwruok kendo bedo kanyakla kode] hera chopo kare kendo bedo mowinjore chutho kodwa, mondo wabed kod chir e chieng' ng'ado bura."

Ng'eyo ni Nyasaye oheri miyi chir Kuome kod yie e

adiera Mare. Gwethni duto ma en godo biro ka iyie kod hera mare: Yie motegno, loch kuom richo, kwe e chunyi, chang, ngima mopong' kod mich gi mor.

Kendo ginyalo biro mana ka iyie mondo Nyasaye oheri. Nyadingeny wakete ataro kendo wawacho ni, kuom adier, onego aher Nyasaye. Aparo ni onego iwe Nyasaye oheri mokwongo. Ok apar ni inyalo hero Nyasaye e okang' ma nyalo miyo oheri in. Muma wacho ni wahere nikech ne okwongo herowa (som Johana 4:19).

Ka wang'eyo ni Nyasaye oherowa kendo warwako hera Mare, to wan bende wanyalo dwoko hera mare. Bang'e wanyalo bedo kode e mbaka. Inyalo wuoro ni ere kaka inyalo goyo mbaka gi Nyasaye? Kane Nyasaye oluonga mondo wago kode mbaka, ne abedo mana e kom kaeto awacho niya, "Koro en ango, Nyasaye?" Mano kare! Ne ok ange'eyo kaka anyalo goyo mbaka kod Nyasaye nikech, sechego, ne ok ang'eyo ni ne ohera marom nade, kendo ne ok an kod winjo matut ni odwaro mondo abed osiepne kendo asik e bathe. Kane akawo thuolo mar bedo kode, ka alemo, asomo wachne kendo seche mondo aling' mos e tiende, ne apuonjora kaka inyalo goyo mbaka mamit kod Nyasaye.

Adwaro jiwi mundo iwuogi kendo ichak wuoth. Chiwne Nyasaye thuolo, to obiro puonji kaka inyalo goyo kode mbaka. Ok abi miyi yore moko ma inyalo goyo godo mbaka kod Nyasaye. Ok adwar mondo ibed kod ondamo mokwongo, mar ariyo, adek kendo kamano. Adwaro mondo otelni kod Roho Mare Maler. Nyasaye dwarz mondo ibed thuolo kode .. nikech bende, ka isomo JoEfeso 3:17, Chunyi e kama Kristo odakie.

# 4



## HERA ADIERA KOD YIE

*“Nimar [ka wan kuom] Kristo Yesu to bedo moter nyangu kata bedo ma ok oter nyangu, ok kony gimoro, to gimoro achiel kende madwarore en mana yie matiyo kuom hera.”*

— JOGALATIA 5:6

Ji mathoth kuomwa kawo ndalo mangeny ka gitemo bedo gi yie. To ng’at maonge gi yie ok nyal bedo malong’o ni Nyasaye (som Johibrania 11:6), koro watiyo kendo watemo bedo kod yie. To yie dongo e chunywa, kendo wayude mana kokalo kuom tudruok mar hera ka wagoyo mbaka kod Nyasaye kendo wawinjo wachne. Obiro mana kokalo kuom fweny mar Nyasaye. Kuom adiera ok anyal puonji yie, to anyalo puonji mana weche ma oyiengore kod yie mabiro miyo ibedo kod gombo kendo ibiro timo gimoro amora mondo ibed kode. Yie en lwedo mawuok oko mondo okaw mich ma Nyasaye chiwo.

Onego kik wachandre matek ka wamanyo yie mondo wamor godo Nyasaye, to wachak tiyo gi kindeno kod teko kuom Nyasaye, e here, kendo yudo hera Mare.

2 Jokorintho 5:7 wacho kama, “To yie ema telonwa, [wachiko ngimawa kendo watimo gik moko kaka ichikowa kata yie chiwo luor ne tudruok man e kind Nyasaye gi dhano kuom gik Maler, kendo bedo e adiera kod chuny man thuolo; ka wawuotho] to wengewa ok telnwa.”

Kane asomo ndiko ni, ne achich ni Nyasaye wacho weche makelo lokruok ne chunya. Ne osiemona ni ok en dwarz kendo temo mondo iwuoth kuom yie ema tiyo. Wechegi temo nyisa ni abiro nyalo wuotho kuom yie kaluwore gi gima ange’yo kuom Nyasaye.

Bed mos kendo ipar ane wachno, penjri ane kaka iwinjo osiep mari kod Nyasaye chalo. Ng’at ma oketo parone ni ok en ng’ama kare e nyim Nyasaye ok nyal wuotho kuom yie. Oseketa kare gi Nyasaye kokalo kuom Yesu Kristo mane obedo kaka misango maler (som 2 Jokorintho 5:25). Long’o marwa ok oyiengore e gima wasetimo kata ma wabiro timo; to oyiengore kuom gima ne Yesu ne otimo. Koro ng’at maparo ni en osepodho mangeny kendo Nyasaye ok ohere ok nyal wuotho kuom yie.

Jogalatia 5:6 wacho ni yie tiyo kaachiel kod hera. Ji mathoth paro ni ka gihero ji, to yie margi biro tegno kendo gik ma gidwarz kuom Nyasaye gibiro yudo.

Kata obedo ni Nyasaye dwarz mondo wawuoth e hera, ok yot timo kamano nyaka wakwong wamiye thuolo mar herowa. En gima ok tek: Ok wanyal chiwo gima ok onego wachiw. Ne atemo kuom higni mang’eny mondo abed kod ji gi hera nikech ne ang’eyo ni en chik Nyasaye, to ne ok onyalore ma nyaka ne ayudo hera mar Nyasaye kuoma. Kaka ne amedo winjo maber e kaka ne amedo chopo ir jomamoko gi hera madieri. Ka ing’eyo okang’ ma

Nyasaye oherie, to ok nyal bedo matek yudo gweth koa kuom Nyasaye kendo ochop dwaro mari. Gima omiyo ji ok yud gik moko en nikech, ok gi yie chuth ni Nyasaye oherogi kendo ogombo chopo dwachgi ka ogwedhogi.

Inyalo wacho niya, “Adwaro yie gi wachno, kata kamano, e yo mane?” In gi hera mar Nyasaye kuomi, kendo gima dwarore kuomi en ni mondo ichak fwenye ka otang’o ni godo. Muma wacho niya, “wa here, nikech ne oherowa mokwongo (1 Johana 4:19). Ok nyal bedo mayot mondo iher Nyasaye ka ok in gi adieri ni en ema ne okwongo heri.

Hera mar Nyasaye ni e chunyi matut ahinya kendo ibiro ng’eyo mano ka ichako ng’iyori kaka ong’iyi. Owacho ni in ng’ama iwuoro, ma jaber, maber, man gi mich kendo man kod nengo kuome. Nyasaye oheri!

Onge ng’ato e piny ngima mabiro heri kaka Nyasaye oheri. Kaka imedo lamo kuom hera mar Nyasaye e kaka omedo miyi yie kendo dago ngima mane odwaro mondo ibedie.

Ok idwar nga’to ang’ato mak mana Nyasaye, to kata kamano obiro keto jomoko e ngimani. Adiera en ni, ka dine onge jomoko mak mana in kod Nyasaye kende, dine obedo maber. Nyasaye biro bedo osiepni maber. Obiro bedo jabathi ka ionge kod moro. Onyalo bedoni minu kata wuonu ma onge. En e gik moko te ma idwaro. Kik itim richo mar kwayo Nyasaye mondo otimni gik moko; kwaye mondo obed machiegni kodi. Kwaye mondo obed mang’eny machiegni gi ngimani. Kwaye mondo en ema opong’ ng’imani ndalo duto (som Jo- Efeso 3:16,19).

Nyasaye oheri pile kendo ogombo mondo oromni e dwachi kod gombo mag chunyi. Kapod imor kode e ngimani,

obiro miyi gigo e yo ma odwaro e kinde ma owinjore (som zaburi 37:4). Nyasaye ne onyiso Abraham ni obiro gwedhe kendo okete obed gweth ne joma moko. Ma e gima Nyasaye dwarzni mondo otimni, to nyaka ibed gi yie! Ket yie mari kendo ibed gi adieri e singo ne duto te nikech gin meki!

### **Yie to kod tije mag ringruok**

Inyalo wacho ni ng'uono en gombo ma Nyasaye ni godo kotoyo kod teko mare e ngimani mondo ochop dwarzoni. Mana kaka Nyasaye, kuom nguono, ne omiyi yie moromo mondo iyud warruok, kendo nikech hera mare, miyi yie mondo igen kuom gik mamoko ma idwaro. Inyalo dwarzni joma ihero mondo oyie Kristo to kata kamano adier en ni ok inyal keto ng'ato ang'ata mondo oher Nyasaye. Inyalo lemo kendo kwayo Nyasaye mondo oti e chunygi, to kata kamano ok inyal keto mondo otimre kod tiji iwuon.

Tije mag ringruok, kata gik moko ma watemo timo gi tekre wa wawegi, pile ka pile miyo wawinjo parruok gi chuny lit nikech watemo timo gino ma Nyasaye kende e manyalo timo. Watiyo to ok wayudi dwoko ma kare. Gima onego watim en ni wabolre wawegi e nyim Nyasaye kendo kwayo kony mare. Muma wacho e 1 Petro 5:5 kama, Nyasaye balo, kwedo kendo oloyo josunga to kata kamano “ochiwo ng'uono (ng'uono, gweth) ne joma muol.”

Ng'uono mar Nyasaye en gima duong' ahinya e ngimawa. Ne owarowa gi ng'uono kokalo kuom yie, kendo e kaka onego wadag e ngimawa pile—kuom ng'uono Mare kokalo kuom yie! Ka in kod mise mar hera mar Nyasaye e ngimani, to koro inyalo chako yie kuome. Inyalo wuotho kuom yie to ok gi wengeni. Ibiro ngeyo e chunyi ni Nyasaye en ja adiera kendo rito singruokne.

Muma wacho niya (Amp. Bible) “Yie en yiengo ngimani te kuom Nyasaye ka iketo yie chuth kod chir e Tekone, Riekone kod Berne” (Jo-kolosai 1:4). Ka iyie mondo Nyasaye oheri to ibiro timo kamano. Kaka tudruokni gi Nyasaye medo dongo e kaka yie mari medo tegno.

Ibiro neno ka Nyasaye timo gik madongo ne in kendo kokalo kuomi, kendo nikech in, kata kamano ochakore kod fwenyo hera Mare. Nyasaye oheri! Kik iparri e wachno.

# 5



## BEDO MAONGE KOD LUORO

*“Luoro onge ei hera [luoro ok bedi]kendo hera riembo luoro. Luoro en kum, omiyo ka ng’ato nigi luoro to pok ochopo e hera maradier..”*

— 1 JOHANA 4:18

Wanyalo chopo kamoro ma yie marwa oromowa chuth, ka wageno Nyasaye gi chir nikech oherowa. Bang’e apoya nono jasigu oro gimoro mondo omonjwa godo.

Okenge mag ngimawa—gik maricho matimorenwa—nyalo temo yie marwa malit ahinya. Jomoko onge kod chandruok e keto yiegi ni Nyasaye oherogi ma nyaka gimoro marach timre negi machal ka gima Nyasaye ok oherogi.

Mano e ka jasigu biro gi luoro kod kum marach mondo pog i gi gimaber ma biro konyi—Hera mar Nyasaye. “Kare, mae to koro nade?” Jasigu biro wacho kamano. “Ne aparo ni Nyasaye oheri. Koro ang’o momiyo gik maricho timoreni? Nyaka bedni isetimo gimoro marach. Nyasaye ni kodi gi mirima.”

En gimayot mondo genoni kuom Nyasaye orum e seche

ma in e tem kata ka ikalo e chandruok, seche ma nenore ni piny ok ber kodwa kata gik moko obedonwa ataro. Nyasaye ok tim gik moko kaka waparo ni onego otim, en kod chenro ma opogore kod marwa mabor. Odwaro ni olokwa moloyo loko okenge ma wantie. Otiyo kod kinde mag lit mondo oger yiewa kuome kendo okonywa puonjore yie kuome kende. E seche ma kamagi, ok wanyal winjo tiend gima timore kendo yot mundo walwar e obadho ka waparo ni Nyasaye ok oherowa. Mano e kaka onego wapar Jo-Rumi 8:35-39, ma wacho ni, adier onge gima dipogwa gi hera mar Nyasaye kendo waloyo gigo duto chuth, nikech teko mar Kristo Yesu. Gima ber ma wanyalo timo ka wan e masira en kok matek niya, “Nyasaye ang’eyo ni ihera, kendo ageno ni mae biro timore maber nikech an.”

Seche moko Nyasaye rito mundo oreswa ma wapar ni osedeko ahinya. Bende iparo Lazaro? Ne otuo, to Yesu ne orito nyaka ne otho koreka odhi mundo okonye kaachiel joode. Matha ne onyiso Yesu ni ne osedeko ahinya, to Yesu ne ong’eyo gima ne otimo, kendo ne ochiero Lazaro e okang’ mane omiyo Nyasaye duong’ ahinya. Nyasaye seche moko ok nyal tiyo kod chenro mar kinde ma wan ema waketo, to kata kamano ok obi deko. Ka in kod chandruok e ngimani, ket wang’i kuom Nyasaye ka ichiew yie mari.

1 Johana 4:18 en wes man kod teko ahinya: “Hera maradier riembo Luoro.” Ne alamo kendo alamo e wesno, ka atemo mundo akete e pacha, to chieng’ moro achiel ne awinje: hera maradier riembo luoro, kendo Nysaye e hera maradier. Ka inyalo ng’eyo kaka herano en adier kuomi, to ok inyal bedo maluor.

Kata ka inyalo winjo ka iluor, ibiro medo dhi nyime gi Nyasaye nikech ing’eyo ni en kodi pile.

Tek mondo iluor podho ka ing'eyo ni Nyasaye oheri. In thuolo mar temo timo gik moko nikech ing'eyo ni Nyasaye oheri kendo rwak Mare ok oyiengore rieko kod tekon. Ok inyal yudo wichkuot ka iketo genoni kuom Nyasaye. Inyal mana podho ka iketo geno mari kuomi iwuon. Gik moko ok nyal timore maber chuth kaluwore kod chenro mari, to gibiro timore kare mana ka ichomo wang'i kuom Nyasaye. Ka ing'eyo ni Nyasaye oheri, ok ibi luoro wichkuot, akwede, chando gimoro, gima osekalo, gima biro kata gimoro amora machielo.

Hera mar Nyasaye duong' kendo oumo gik moko duto. Bende iparo ni Nyasaye achiel mane owari kendo oketi ibedo thuolo nyalo miyi wichkuot? Bende onyalo weyo ma ok okonyi? Satan e jasik chunywa. En jakuo kendo jamiriambo, kata kamano, Yesu dwaro mondo wabed gi ngima maber chuth kendo wabedo mamor (som Johana 10:10).

E Muma mar (Amp Bible), 1 Johana 4:18 wacho: “Luoro onge ei hera [luoro ok bedi], to kata odongo ma opong’ (ma orumo, maber chuth) hera duoko luoro gi ng’eye e dhoot kendo oriembo kit midhiero duto! Nikech luoro biro kod paro mar kum, kendo [koro] ng’ato ang’ata ma oluor, kare pok ochopo e hera motegno [pok odongo ma moromo maber chuth].”

Bang’ kane Nyasaye osekonya ma awinjo ni hera mare riembo luoro, ne aketo rieko no e tim. Ne wan kod chandruok moro e gachwa matin. Ne waparo ni nitiere gima onego waloki to ne waonge kod pesano. Koro ne wariembe ariemba ka ok wapar ni obiro kethore ma ochung’.

Ne awinjo ka Nyasaye ne jiwo chunya okinyi moro kod weche gi: “Joyce, ti kod odiechiengni e miya hera mari

mondo an bende ine hera mara kuomi. Kik itim gimoro amora. Ok ochuno ni nyaka item bedo dhako man kod yie. Gima nyaka itim en mana bet e hera Mara.”

Kane oyudo awer, kendo ne aloso wende pak ne Nyasaye, ka awinjo maber. Apoya nono, ne awinjo jaoda e kar yiengo gari marwa, dakika piero ang’wen gi abich bang’ kane osedhi e tich. Ne oyawo dhoot ka owacho niya, “Gari otama choro kama ochung’e, nyaka watere odhi omany kama chandruok nitie mondo olose”.

Ne aloro dhoot kendo achako nyiero. Ne ok en gima atimoga kendo ne ok en gima ne ayiero mundo atim e sechego. To parono ne obiro nikech ne aseyiero hera mar Nyasaye kuoma, ne anyalo nyiero kata seche ma weche tek. Dak e hera mar Nyasaye miyo yor yie yawore ka odino ne luoro. Ne achako mana nyiero, kendo mano ne en yie. Ne anyiero nikech ne ang’eyo e chunya matut ni, Nyasaye oherowa kendo obiro miyowa gino ma wadwaro.

Abraham ne onyiero nyiero mar yie. Kane Nyasaye odhi ire ma onyise ni obiro nyuolo wuowi, Abraham ne onyiero! Ne ong’eyo ni ne onge yo machielo, ma en kod Sara ginyalo yudoe nyathi, to kata kamano ne en gi yie kod Nyasaye, kendo mor mare ne olokore nyiero.

An gi yie ni wan bende ka wabedo kamano to dhoot biro yawore kendo Nyasaye yudo thuolo mar donjo ma okonywa kaka ok wapar. Ng’ama dibed gi paro mar nyiero ka en kod chandruok? Muma wacho ni, Ruoth Nyasaye to nyierogi, ka obet e kome mar duong’ e polo (so Zaburi 2:4). Ka Nyasaye nyalo timo kamano, kare kata wan bende. Dhi nyime ka inyiero nyiero mar yie. Nikech gimaduong’ en ni, Nyasaye oheri. Kendo ka Nyasaye jakori, to ng’ano ma dihimi?

# 6



## HERA MANYO

*“To chik (siem,wach ma nyaka wawuoth godo) ma waseyudo  
kuom Nyasaye e ma: ng’ama ohero Nyasaye nyaka her  
owadgi (ng’ano moyie) bende.”*

– I JOHANA 4:21

In nyathi Nyasaye ma owalo, Owachoni ma e Rapar Mar Chik 7:6. Ka ing’eyo adiera ni in ng’ama owalo kendo idak gi mor kod chir ma wachni kelo, to ma biro bedo kod teko e aluora ma idake e yoo maber. Ibiro dhi e chiro ka in kod mor e wang’i, ka iparo ni, ohera. Weche duto dhi maber e ngimana. Anyalo gwedho jomamoko gi hera mar Nyasaye ma an godo e ngimana. Inyalو bedo mamor kamoro amora ma idhiye, kendo morni biro gwedho jomoko bende. Zaburi 100:2 wacho niya, “Lameuru gi ilo, kendo biuru e nyime ka uwer gi mor!”

Ka wachako ng’eyo kaka wan joma oval ne chenro mar Nyasaye kendo kitwa gi timbewa otenore kuom fwenyno, wanyalo medo lando Kristo ka wanyiso hera e yore ma ywayo ji ire. Hera mar Nyasaye mamol kuomi biro miyo ikech ji, kendo ng’iyoji gi wang’ mang’uon. Herane

man kuomi biro keti thuolo ka ogolo luoro kuomi, kendo ok ibi luor chopo ir jomoko gi hera. Ok ibi luoro akwede, kata joma tiyo kod thuolono marach; Hera mar Nyasaye kuomi biro neno dwarogo ma jomamoko ni godo kendo item konyogi.

Nyasaye dwarz mondo iyie Kuome ka owacho ni obiro timo gik madongo moloyo kokalo kuomi, nikech Yesu ni kuomi. Bed kode gi yie kod adiera ni odwarz mondo oti kodi kuom hero kendo konyo jomamoko. Wapar ni hera mar Nyasaye miwuoro riembo luoro, koro kik luoro tami wuok oko gi yie.

Ok anyal kata mana nyisi ni asechung' marom nadi e "e geng yie," ka aikora timo gima lich ahinya, kendo ka chalo ni Nyasaye wachona ni, "Bi, Joyce bi. Abiro timo gik madongo kokalo kuomi. Med biro." E kinde ma achako wuoth gi yie kendo adonjo e chunye, Nyasaye pok ne ogoya piny.

Bende ing'eyo gima omiyo aonge gi parruok kuom wuok oko mondo atim gimoro kata ka ayudo wichkuot? Nikech ang'eyo ni, Nyasaye ohera. Ohera, kendo ang'eyo ni ahere En, kuom ng'uono mare aseduoko ngima mara piny. Ka isetieko timo mano, kendo ihero Nyasaye to kendo ing'eyo ni oheri, to koro onge chandruok ma ok inyal loyo kokalo kuom Kristo.

Ka gomboni adier en ni mondo ikony ji mamoko, Nyasaye biro konyi mondo ikonygi. Ok ochuno ni nyaka ibed kod nyalo mang'eny; dwarore mondo ichiw thuolo mari ne Nyasaye, kendo obiro timo modong'. Inyalo winjo ka were mari orem, to kata kamano seche moko kaka gimoro medo bedo mayot, e kaka omedo bedo kod teko.

Kik idag ngima mar herruok kend ka itieko tekon, e dwaroni iwuon kendo ka igombo mondo ichop dwaroni. Nyis Nyasaye gino ma idwaro kata ichando bang'e ichom pachi Kuome tir mondo ibed ka iwinjo kaka Roho Maler biro teloni chopo kendo gwedho jomamoko.

Gima iketo mondo otimre ne ngama chielo, Nyasaye biro miyo otimre ne in. Ka in kod dwarz, bed kod "paro mar kodhi," to ok "paro ma dwarz." Ma nyiso ni ka idhi ir jomamoko, Nyasaye kawe kaka kodhi ma opidhi ne keyo ma igombo e ngimani iwuon.

Ji duto dwarz mondo obedo gi mwandu mogundho, to dwarore wawinj tiend bedo gi mwandu mar adieri. Ahero wachoga ni en okang' mar tiyo kod nyalo mar Nyasaye e yudo gigo ma wadwarz e ngimawa. Hera mar Nyasaye biro miyi teko mar keto dwarz mar jomamoko mokwongo. Bende iparo ni Nyasaye oheri moromo ma Onyalo tiyo kodi mondo ichopi ir jomoko gi hera, kata kuom jogo ma tek hero: jogo ma onge kod mor, ma onge gi erokamano?

Ok en kum malich ka ihero ng'atno ma oheri bende. To kata kamano nyaka ng'uono mar Nyasaye konywa mondo waher jogo maok oyie gi hera. Hera mar Nyasaye mamol kokalo kuomwa biro konyo nikech Herane onge kod chik moro. Wayude nono kendo wanyalo chiwe nono. Hera ok rem kata jok kod ji. Onyalo kawo higa. Onyalo kawo higni abich, Onyalo kawo higni piero ariyo kod abich, to kata kamano pod ber moloyo. Ka in gi pek mar bedo gi horruok kod hero kuom ng'at matek hero, to parie kinde mane Nyasaye osebedo ka osiko oheri kane orito mondo iyie oloki.

1 Jo-Korintho13: nyisowa ni hera en horruok, ng'uono

kod bolrruok. Ok en manyruok kend, winjo ni iber moloyo, chwanyruok mayot. Kido ma kamagi ema Yesu golo kuomwa kokalo kuom hera mare kendo wan bende wanyalo luorore ka watimo kamano ne ji ma hinyore, malal ma odenyo ne wach Nyasaye e ngimagi.

Nyasaye oheri, kendo ohero jogo ma odak machiegni kodi bende. Oherogi, mowar kata ma podi, kendo odwaro mondo oti kodi kaka yoo mar nyiso herane.

Kik iluor mar wuok oko. Hera mar Nyasaye keti thuolo kuom luoro kod akwede, kendo osemyi nyalo mar chiwo hera. Ket pachi e lando hera Nyasaye ne jomamoko. Inyalo chako kod mako osiep gi ji. Ket timni pile obed mar mako osiep kendo bed gueth ne ji kamoro amora ma idhiye.

Rwako ji en yo matin mar nyiso hera, moloyo to ne ng'atno man kende kata ma chunye onyosore. Gwel ji e migago mar otieno. We mondo ji olimi. Mos ji gi lweti ka ibuonjo. Mos ng'ato ka ikwake kata jiwe gi wach. Chiw kony ma ineno, kaka kowo ng'ato ma gache okethore e kar tich mare. Bed machiegni gi joma ondiki ma welo e kar tich ka ikonyogi ng'ijo kod aluora margi. Nyasaye ni kod gimoro monego itim. Ok Onyal bedo gimoro maneno maduong' kata man kod nengo ne in, to en gima ni kod nengo ne En. Dhano ni kod nengo kuom Nyasaye.

Nitiere oganda moko ma in kendi ema inyalo chopo kuomgi. Kwa Nyasaye mondo osiemni kaka inyalo chopo kuomgi gi hera mar Nyasaye, kendo obiro puonji.

# 7



## HERA MAR NYASAYE BIRO LOKI

*“To hera maradier ok en hera mane waherogo Nyasaye, to en hera mane Nyasaye oherowago kuom oro Wuode ma miderma mondo odok misango (misango mar puodhruok) mar golo richowa.”*

– 1 JOHANA 4:10

Nyasaye oherowa, to ok apar ni ng’enywa nyalo paro matut kaka heraneno duong’ kata ni oherowa maromo nadi. Nyasaye osetang’ona kokalo kuom puonjruokna e thuon wachni, ka wanyalo ng’eyo, e chunywa adiera ni oherowa marom nadi, to kitwa nyalo pogore gi kaka wabedo pile.

Bed e twak e wach hera mar Nyasaye kuomi, mano e gima biro loki. Ka ok ihero gimoro e ngimani, to fwenyo kendo yie ni Nyasaye oheri ka irite mondo olosi biro konyi bedo gi mor e wuodhno. Ka chunyi ok nyalo chandore kata matin kuom gikma ok itimo makare, to ok inyal lokori. Parni Nyasaye tiyo kuom yie, kendo yie maradier miyo wadonjo e yueyo mar Nyasaye.

Chalo ka gima ji mang’eny onge gi tudruok malong’o e kindgi giwegi. Ok gidwarre kendo ginyalo kata kwedore

kendgi. Ka itemo chandori paro kaka inenor iwuon, to adwaro keto e pachi ni inyalo kwedo gik maricho ma itimo, to kik ikwedri iwuon. Yesu ne otho ne in nikech herane maduong' kuomi, kendo kendo odwaro mondo irwak mich mare nengone tek.

Muma wacho niya, "Nikech kaka oparo e chunye, e kaka obet" (Ngeche 23:7). Ka iwinjo marach e ngimani seche duto, ikwedori kendi kendo ok ifweny kaka in kod nengo, ok inyal yudo kue kod mor mar Nyasaye, kendo kido gi timbeni biro nyiso. Mago duto bedo nikech pok imako e chunyi adiera man kod teko maloko ngima, ni Nyasaye oheri ahinya moloyo kaka ing'eyo.

Nyasaye dwari mondo iyud kinde kode pile ka pile. Mano e gima biro loki. Ka ok iketo Nyasaye mokwongo, to ikete e okang' ma ok onyal timo gima owinjore otimni. En e kinde makende ma iyudo kod Nyasaye, ka ihere kendo imiyo oheri mano miyo ibedo motegno, jachir kendo ma ochwiny.

Ji mange'ny badhore kendo ok gi kaw thuolo mar loso tudruok margi kod Nyasaye. Gigombo bedo gi tudruok malong'o kode, to kata kamano ok gikaw kinde mar tiegruok kendo gero kido mabeyo kuomgi kaka somo wach Nyasaye kod lemo. Ka in kod chandruok gi wachni, to lem kendo penj Nyasaye mondo okonyi gero kido mar bedo machiegni kode pile ka pile. En e gi makare ma wanyalo timo!

Hera mar Nyasaye biro loki. Ka imedo bedo kod hera Mare kendo ibedo gi nge'yo kendo ifwenye pile pile, to ibiro yudo ka dwaroni lokore. Ibiro dwaro mondo ibed kaka Yesu, Jal ma oheri. Ng'eyo kendo gero kido mar Nyasaye e ngimawa onego bed achiel kuom dwaro marwa mokwongo

chuth. Paulo wacho ni gima odwaro timo en mana ng'eyo Kristo kod teko miyudo kuom chierne (som Jo-Filipi 3:10). Kete e pachi ni Paulo wacho ni ochune ni nyaka.

Adwaro ni ajiwi mondo itegno e tudruok mari gi Nyasaye. Inyalo bedo machiegni ahinya gi Nyasaye kaka inyalo; luwore kod kinde ma igombo mundo iketne.

Muma wacho niya, Omiyo wan joote Kristo, kendo Nyasaye owuon ema wuoyonu gi dhowa (som 2 Jo-korintho 2:20). Ndikono pile mako chunya kendo omiyo abedo gi paro manyien, kaka en gima ni gi nengo ka Roho mar Nyasaye telonwa ka otiyo kuomwa, olokowa kendo olosowa maber ne tich Nyasaye. Hera mar Nyasaye oseol e chunywa gi Roho Maler ma nochawnwa (som Jo-Rumi 5:5). Rwake, yud mor kuome, kendo yie mondo oloki!

# LEMO MAR WARRUOK



Nyasaye oheri kendo odwaro mondo ibed kode machieg-ni, ka pok iyie Yesu kaka Jawarni, inyalo timo mano sani. Yawne ne chunyi mundo ilam lemoni...

*"Wuonwa, ang'eyo ni aseketho e nyimi. Akwayi ni yie ing'uonna. luoka abed maler. Asingora mar keto yie kuom Yesu, Wuodi. Ayie ni ne otho ne an—Ne okaw kethna duto kane otho e msalaba. A yie ni ne ochiere ka oa kuom joma otho. Achiwo ngimana ne Yesu e thuolo ni.*

*Erokamano Wuonwa, kuom michni mar ng'uono kod ngima mochwere. Akwayi konya mondo adag ne in. e Nying Yesu, Amin,"*

Kaka iselemo gi chunyi, Nyasaye oserwaki, oseluoki kendo osegoli e twech mar chuny mar tho. Kaw thuolo mondo isom kendo ipunjri wesgi kendo penj Nyasaye mondo owuokodi ka iwortho wuodhni e ngimani manyien.

Johana 3:16	1 Jo-Korintho 15:3-4
Jo-Efeso 1:4	Jo-Efeso 2:8-9
1 Johana 1:9	1 Johana 4:14-15
1 Johana 5:1	1 Johana 5:12-13

Lem kendo Ikwaye mondo Okonyi iyud kanisa maber moyie kuom weche mag Muma, mondo ojiwi idongi e tudruokni gi Kristo. Nyasaye pile ni kodi. Obiro teloni ndalo ka ndalo kendo obiro nyisi kaka inyalo dago ngima mochwere ma oseikoni!

## KUOM JANDIKO



JOYCE MEYER en achiel kuom jopuonj motelo e piny ngima e puonjo weche mag Muma. En jandiko marahuma e New York Times, ma kitepene ng'iewore moloyo, kitepene osekonyo ji gana gi gana yudo geno kendo duogo chuny ji e weche Kristo. Kokalo kuom yalo mar Joyce Meyer Ministries, opuonjo weche ma opogore opogore ka oketo teko kuom paro, dhok kod kido.

Kite kaka owuoyo ka en thuolo miyo opimo ayanga kendo gi tim gik ma osetimorene mondo jomoko bende oyud puonjruok kuom gikma osersetomo e ngimane. Joyce osendiko buge ma dirom 100 ma oselok e dhok 100. Obedo kod puonj mathoth e pinygi kod pinje maoko higa ka higa, ka opuonjo ji mondo obed mamor gi ngimagi ma pilepile. E higni 30 mosekalo puonjne mar mine ma higa ka higa oseywayo mine ma oingo 200,000 e piny ngima. Mor mar Joyce mar konyo joma hinyore ogurore e lek mar Lwedo mar Geno [Hand of Hope] ma en bad yalo mar Joyce Meyer Ministries ma konyo tero ote e piny ngima nyaka kar dakne mar St. Louis.